

四庫全書

集部

欽定四庫全書

世宗憲皇帝御製文集卷十八

祭文

歷代帝王廟祭文

於赫上帝降衷下民惟后綏猷繼天立極大統肇開於
三古丕基遞嬗於累朝崇祀

帝王廟者凡二十有一君厥惟舊矣我

皇考大行皇帝一中允執兩大燕恭彙治功道量之全

極武烈文謨之盛俗盡躋于工理情彌軫乎前光定諸
史之公評抒千秋之卓識謂興王創業既多戡定鴻勲
即令辟守文不乏綏和美化歷年多寡不必同符致治
淺深原難一轍履至尊而制六合聯寰宇以為一家萬
方共戴尊親億兆胥依父母即當奕世維新之治追念
勝朝式廓之疆曾經食土踐毛尚有先疇舊德豈得以
拘儒苛論妄絜短長更難以稗乘渺聞恣憑褒貶
特頒明諭遍採羣言亘登溥薦於

百王棖楠永光夫萬禩亦有熊羆之士宣力旂常不無
鼎鼐之臣勞心輔弼股肱一體生前獲荷天休廊廡列
筵身後仍陪廟享於戲彛章隆重仰惟志事以虔遵至
治馨香尚冀

神靈之默佑式孚冥漠庶克居歆

追封孔子五代告祭文

道尊往聖宜錫類以推恩牒溯前徽乃緣情而制禮絲
綸聿賁俎豆維新仰惟

先師孔子撰合乾坤名高日月纂修刪定煥六籍之文
明祖述憲章樹百王之儀範朕夙承

庭訓嚮往實深誕紹丕基欽崇彌切惟德全而業盛知
積厚而流光爰命廷臣式稽譜系詒謀式穀洵篤慶於
一門毓秀鍾靈宜上追於五代並躋祀典特晉王封體
皇考敬師之心弘

先聖顯親之孝於戲金聲玉振集今古之大成木本水
源享烝嘗之美報靈其不昧尚克來歆

文廟增定從祀告祭文

道宗前聖尊萬世之師資緒啟後賢備千秋之祀典虔
將蘋藻聿告几筵仰惟

先師孔子德配乾坤心傳堯舜文垂六籍揭大義以昭
明教設四科育英才而蔚盛雖微言漸遠難窺達天盡
性之功而正脉相承不乏入室升堂之彥朕紹登寶位
親詣辟雍爰因釋奠之時更切崇儒之念特頒諭旨博
訪廷臣考自有周逮於昭代凡在傳經之哲咸躋從祀

之班茲卜良辰以林放等二十六人新造牌位安奉兩
廡以張載之父張迪新造牌位安奉崇聖祠於戲闡揚
經術長歆俎豆之馨廣厲學宮益篤羹牆之慕伏惟
聖鑒格享茲芬

闕里告祭文

仰惟

先師孔子道高千古業著六經集聖學之大成樹人倫
之標準朕紹承丕緒仰止

師模溯譜系以追封入成均而釋奠不謂杏壇之地忽生回祿之災雖

像位幸存而櫨楹俱燼具聞奏報實切兢惶豈成毀有時竟莫爭於定數恐尊崇未至祇難釋於中懷即遣所司協同大吏飭工材而備豫占時日以經營將式煥夫宮牆期重新於丹雘辟雍伊邇已親詣以昭虔闕里云遙用專官而展祭慰安靈爽瞻望格歆謹告

太學文廟祭文

金聲玉振集神聖之大成霞蔚雲蒸表天人之上瑞肅
將蘋藻奉告几筵仰惟

先師孔子德邁皇王學該河洛綜五百年之傳緒聿峻
宮牆立億萬代之師模永光俎豆自廟堂之重建準宮
殿之鴻規盡誠敬以經營務尊崇其制度乃者將升畫
棟選卜良辰忽覩卿雲光輝晴晝芝英爛熳映泗水以
霏烟車蓋輪囷倚岡而結影當前期之二日有開必
先瞻垂象者三時惟形則著絢於東國顯徵丹雘之祥

耀彼南方弘闡文明之運

上帝之凝庥滋至

先師之降鑒孔昭實感慶於衷懷用吉蠲而躬詣於戲
羹墻如見彌殷重道之忱霄漢為章佑啓作人之化
神其如在歆享苾芬謹告

先師孔子誕辰告祭文

金聲玉振開宇宙之文明月角珠庭垂聖神之儀範肅
敷筵几聿薦藻蘋仰惟

先師孔子學綜圖疇統承堯舜道超萬類喻海河泰岳
之崇深德服羣賢比江漢秋陽之皎潔溫良恭讓之度
邦國共欽齊莊中正之容簡編備載新營廟貌虔製俎
樽竭誠敬之心思極尊嚴之規制乃者歲逢庚戌序屬
仲秋上朔周朝近當今日推之長歷即尼山降誕之時
卜以良辰是闕里增輝之會用稽徽典適協貞符於戲
棟宇恢闔已慶雲霞之紉縵堂楹端儼重瞻日月之光
華

神鑒孔昭苾芬歆享

聖廟告成祭文

達天盡性樹萬世之師模重道尊經煥千秋之廟貌肅
將嘉祀用告成功仰惟

先師孔子得聖之時由天所縱纂修刪定啟宇宙之文
明祖述憲章綜帝王之統緒升堂入室洪施樂育之恩
學禮誦詩永作義方之桀比高懸之日月亘古莫踰喻
出類之鳳麟生民未有朕奉遺編而欽企儀典務極其

推崇循舊址而鼎新經營必盡其誠敬頌於國帑董以
大臣每繪式以先呈乃按圖而指授榱桷枯柏求大木
於名山簠簋樽壘選良工於內府晶熒黃瓦準制度于
宸居璀璨玉圭儼威容於

聖座懸標題之巨榜洒翰親書建此峙之豐碑摛文恭
紀工程累歲時深嚴恪之心棟宇宏規益備觀瞻之美
華棟雕柱增輝講道之壇璆磬金鏞重振大成之殿數
仞之宮牆逾峻兩楹之俎豆虔陳特遣皇五子弘晝等

親詣几筵敬行祭告於歲卿雲糾縵已開丹牖之祥古
檜貞堅佇望青蒼之色惟祈鑒格式享苾馨

日月合璧五星聯珠告祭

景陵文

聖德流光貽嘉祥於奕世

天文垂象煥精采於重霄紀史籍以揚芬陳几筵而告
慶欽惟

皇考聖祖仁皇帝道邁義軒功叅覆載秉至明以照物

日月齊輝凝庶績以宜民星辰就叙心通歷數稽密度
於渾儀化協陰陽驗休徵於洪範山陬海澨無非樂利
之區炎嶠朔陲盡是協和之氣延

穹蒼之眷佑觀辰次之昭回乃者候屆仲春日當初吉
二曜同躔而璧合五星聚舍以珠聯營室應清廟之占
姬訾號乾宮之位自歷元而後曾聞顓頊之時由世紀
所書直比陶唐之代歷四千餘年之久遠再見星占追
六十一載之皞熙用彰

天錫仰惟

先烈實為鍾慶之餘逮及眇躬幸值迓庥之始當累傳
之寶祚景命彌隆合萬國之歡心鴻名益耀於歲貞符
上瑞式勤昭事之忱

峻德豐功長切祇承之念伏祈

慈鑒俯賜格歆謹告

景陵懸匾告祭文

陵園葱鬱森警衛於百神

殿宇深嚴肅精裡於億禩因標題而展敬告筵几以申
忱欽惟

皇考聖祖仁皇帝學貫圖疇道高軒頊日新盛德恒惕
念於萬幾天縱多能復游情於六藝趨庭而仰觀

聖蹟時荷

親傳伸紙而恭倣

宸章特承

睿獎乃者因山啓隧已占靈淑之徵巨勝豐碑宜極尊

崇之制濡毫灑墨庶誠敬之潛通澄慮凝神儼

音容之如對虔題

徽號真揚疇昔之耿光聿頌

隆恩莫寫平生之孺慕手追心企長懷

寶翰之煙雲倂見愾聞遙感橋山之霜露謹告

黃河澄清告祭

景陵文

瑞應光昭荷垂庥之慶澤嘉徵迭告顯默佑之鴻慈望

園寢以抒誠薦馨香而伸悃欽惟

皇考聖祖仁皇帝道濟羣生恩濡萬國豐功巍煥慶海
宇之清寧至治恬熙溥寰區之樂利播六十一載之深
仁厚澤德化旁流緜億千萬世之景祚洪禧太和翔洽
緬

神靈之陟降尤

福庇之深長嘉貺頻仍珍符屢見乃者黃河效順碧浪
澄清由陝州而至桃源地連五省自嘉平而逾獻歲時

閱三旬臣民共慶其難逢史籍曾稱其罕覲俯慚冲眇
實切悚惶深惟昭事之小心敢懈祇承之素志顧此數
年之治理詎能篤迓純庥或因一念之恪誠幸得仰邀
慈眷顧

昊天而錫福致大地之呈祥鑒已往之勤虔勵將來之
兢業寵綏有自感激難窮祇薦牲牢肅陳筵几於戲溯
神謨之底定

方略昭垂揚

駿烈於懷柔苞苴炳耀伏惟

聖鑒俯賜格歆

北鎮廟祭文

惟

神名著禮經位均方嶽峙興京之重地擁衛畿東炳福
國之明靈庇安遼左朕昔奉謁

陵之

命曾申詣廟之虔瞻望層楹遂捐資而營葺紹承寶位

復發帑以增修煥丹腹其如新鐫青珉而紀事溯工程
之肇啟閱歲序之屢更十雨五風協休徵於泰運萬箱
億庾占瑞應於豐年神貺昭彰朕心感慶遣專官以將
事陳牲醴而薦馨所冀巒岫鬱葱奠鴻基之鞏固郊原
膺厚贄和氣以蕃昌惟爾

明神尚其歆鑒

追封關帝三代祭文

東兩間之正氣毓聖有基冠五等之崇班恩推及遠絲

綸誕賁譜牒增輝惟公隴右家聲晉中族望慶餘積善
垂矩矱於高門祥裕詒謀淵淵源於奕葉啟後昆之忠
義大節炳於日星景先世之風規令範昭於弓冶宜加
錫命用示褒揚爰詔禮臣特隆封典建上公於三世崇
報祀乎千秋於戲緬厚德以流光克昌厥後凜英風而
佐化有開必先表曠代之芳型肇明禋之盛舉尚其歆
格鑒此殊榮

關帝告祭文

敦大倫而表範忠冠古今追先世之詒謀禮崇祖考式
頌茂典用展精裡緬惟

關帝素志忠誠天姿勇毅九霄皎日長懸翼戴之心萬
古英風不泯勁剛之氣學宗洙泗生平誦習春秋光動
河山義烈昭垂宇宙仰靈威之赫濯無間於走卒兒童
薦俎豆之馨香且遍於遐陬僻壤高名完節既長耀於
史編福國庇人久特隆於廟祀念神奇之所自信積累
之有基爰命廷臣聿稽門緒千秋華胄美三葉之芳規

五等崇班錫上公之顯號於戲義堅事主躬正直以炳
靈孝重顯親溯本源而褒贈

神其歆格鑒此告虔

清和宣惠風伯之神祭文

惟


神象著箕星德符巽卦動而致雨聿彰地工之功靜不
揚波爰表澤中之瑞考典章於祠部方展精禋覽奏疏
於河臣宜崇封號眷惟淮甸瞻廟宇之舊存念此洪湖

賴隄防而永固氣調清籟經時協應律之占響息商飈
歷載奏安瀾之慶喜

天和之潛感荷

神貺之昭靈是用特封為

清和宣惠風伯之神并命河臣虔陳牲醴所冀導揚元
化順四序以節宣佑保蒸民護百川而奠定尚其鑒格
歆享苾芬



世宗憲皇帝御製文集卷十八

欽定四庫全書

集部

世宗憲皇帝御製文集卷

十九至二十一

臣永琮恭校

侍讀臣孫球覆勘

覆校官主事臣李駿

校對官主簿臣郭作斌

謄錄監生臣劉能

欽定四庫全書

世宗憲皇帝御製文集卷十九

祭文

都城隍廟祭文

靈爽丕昭作皇都之保障規模增煥肅廟貌之觀瞻爰
告成功聿修祀典惟

神拱衛金湯憑依畿甸錫嘉祥於民物應感無私默呵
護乎邦家明威有赫歲時久崇夫祈報殿廡方待於繕

修朕敬禮

明神虔新祠宇發金錢於內府命董理於大臣鳥革翬
飛掩映雲霞之彩虹梁虬柱輝煌金碧之觀妥侑是宜
明禋式舉於戲聰明正直固萬雉於金甌寒燠雨暘調
四時於玉燭

神其昭鑒來饗苾芬

運河神祭文

國家輓運全藉漕渠河水暢流最需雨澤惟

神功能佑國惠足庇民愷澤所敷兆人攸賴乃者春夏之交愆陽間告朕深懷憫惻夙夜省躬維緣河一帶愆雨澤之施以致水淺運艱人勞舟滯揆厥所由朕心甚疚或係去年運阻之日曾施挑濬之功畚揄所加有傷地脉或係地方官吏歲時奉祀不誠或係在運官丁隱痛不聞致違戾陰陽之節凡諸譴告罪在朕躬是用齋心省過遣官致祭

神其鑒此肫誠蘇我黎庶念七州之飛輓速溥雷雨之

慈達百萬之天庾大需油雲之澤俾河水暢流全漕利
濟尚其降格歆此明禋

黃河神祭文

惟

神源通星漢派衍崑崙四瀆稱宗九州滋潤惠澤廣遠
靈應夙彰頃者決口合龍民居攸奠既奏安瀾之績旋
呈清泚之祥里計二千時經旬月錫福固由於
天眷效靈實顯夫

神功用遣專官虔修祀典惟冀光昭庥佑永慶阜安延
景福於萬年溥純禧於兆姓尚其歆格鑒此精誠

河神祭文

朕注心河務禮敬

明神歷歲以來休徵屢著若蘭陽之引河自汕儀封之
深渠忽開允賴

神功豈關人事惟今年黃河之伏汎具覩安恬而季夏
山左之南陬偶生暴漲入駱湖而驟溢望洪澤以奔趨

踰越長隄散瀾廣陌河臣撫臣雖心力之交勵懼功績之難施乃或畚鍤未加而沙淤已見或焚薪甫下而水勢遽消至如宿虹彭家堡者當灣溜之頂衝本歲修之險要加以漫開百丈洶湧倍常忽焉水徑歸於中泓波自迴於北向延袤而出堆為遙擁之灘直暢以流形類斜挑之壩不獨塞一時之暫決抑且省每歲之增修萬夫共歎為奇逢四野爭傳夫異瑞三旬之內早奏安瀾無糜費於金錢匪淹遲於日月糧艘復循其道麥隴未

失其時不作而成豈經營所能就不期而致豈謀慮所及知斯實

穹昊垂庥

明神贊佑式昭符應深慰朕懷特遣河臣虔修祀事聿

申謝悃惟

神鑒歆彌顯光靈永庇助我國家平成之慶

河神祭文

惟

神功昭四瀆德冠羣靈澤國蒙庥新祠在望乃者洪湖
積水沮洳全消惟茲淮甸與區平原相接長阡廣陌增
二萬頃之良疇東作西成貽億兆人之恒產

天庥滋至靈貺孔彰特命河臣遣官致祭興弘開於樂
利用永奏於昇平惟爾

明神尚其歆鑒

河源神祭文

惟

神象應漢津源䟽崑閭匯百泉而出地燦列繁星經九
曲以安流遙趨大海績成底定瑞現澄清茲惟湖波之
新淤喜覩河濱之沃衍乘天時而收地力盈二萬頃之
膏腴裕國計而富民生垂千百年之美利感

帝心之仁愛念

神貺之昭彰特遣專官虔修祀典所冀榮光照燭協世
運之貞符慶澤綿延成寰區之永賴

神其鑒格享此苾芬

河神祭文

惟

神靈發崑崙源通星宿啓圖書之上瑞四瀆稱宗邁蒲
穀之崇封百川咸納功弘潤物滋大地以成能利賴通
漕裕天儲以足用朕自御極以來肇舉明禋屢蒙

神貺波恬浪靜澄清上徹乎榮光闢土便民沮洳悉呈
夫沃壤至於安瀾循軌隄防按候以興工不日成功章
奏合詞而告竣永綿亘於三千餘里普美利於億萬斯

年惟茲政務之咸修實荷

神靈之默佑是用虔將祀事報答鴻庥特遣河臣肅申
謝悃所冀金隄永固著嘉績於平成茂典長膺慶洪流
之底定尚其歆格鑒此茲芬

清口河神祭文

惟

神源開星宿派導龍門因澤國之蒙庥建特祠而崇祀
粵從今歲聞水勢以厓懷爰命河臣殫心思而經理乃

者洚流千里歷汎候以恬波漕運萬艘循長隄而安輓
帆檣載路既國計之攸充禾黍連疇復民生之有慶喜
蒙靈貺顯著休徵聿遣所司親行祀事所冀南趨淮浦
會雙瀆以俱澄東注海壖納百川而永奠

神其昭鑒來享苾芬

武陟縣河神祭文

惟

神澤滋坤壤象應天津恒福國以昭靈用庇民而垂佑

自豫州而過東土遍地安瀾從春半以逮秋中經時順軌乃若儀封北岸濬深渠而迅浪通流蘭邑南隄汕引河而中泓直瀉表瑞三旬之內助靈兩縣之區畚鍤未施工程已固荷

明神之默相感嘉貺之疊彰特命河臣虔修祭典所冀奠茲巨瀆永觀底定之功惠我蒸黎溥被平成之慶神其鑒格歆此苾馨

永定河神廟告成祭文

朕注心河務禮敬

神明遠籌捍禦之宜備舉尊崇之典惟永定河源從山
右古號桑乾經馬邑以奔趨湍波易激歷畿南而漫衍
暴漲難馴顯佑於

皇考之時肇祀於盧溝之北既隆封典爰錫嘉名靈貺
孔昭鴻庥協應朕思石景實處上游宜建廟以安

神命河臣而度地岡巒擁衛控金隄而制洪流棟宇輝
煌駐雲旗而迴巨浪肅將祀事祇告落成惟

神鑒歆永垂庇佑安瀾奏績俾廬井之恬熙潤下成能
享春秋之祈報謹告

奉安石景山永定河神像祭文

惟

神源濬天池派分馬邑滙鴈雲之衆水為畿甸之洪流
睿謨指授於當年嘉名肇錫靈貺昭彰於歷歲祀典虔
修朕纘紹鴻基留心河務喜經流之順軌允賴

神庥相石景之上游載營廟貌輝煌丹雘庶幾靈爽之

式憑蠲潔牲醪特命崇官而祇薦洒翰而題巨榜製文以勒豐碑備舉隆儀用酬嘉貺

神其體茲忱悃惠我蒸黎隄岸無虞喜澄波之永奠田廬有賴樂繡壤之常豐謹告

清口河神祭文

朕軫念民生厯懷河務虔修祀典敬禮

明神數載以來屢蒙嘉佑惟東南之澤國當邳宿之要區湖泊瀾連每戒風濤之險淮黃交匯時深漲溢之虞

聿自今秋時逢汎候洪波萬派循軌道以安流巨浪千
層繞長隄而順下畚鍤先時而增築共保堅完帆樯載
路以輓輸允資利涉歲事有京坻之慶居民登衽席之
安斯皆仰荷鴻庥顯承靈貺封章來告感慰實深特命
河臣載稽典禮明禋敬展用申報享之精誠

神典式憑尚真鑒歆而來格永孚默相弘贊平成尚饗
浙江海神祭文

明神受職於

天恩覃澤國禦災捍患利賴宏深凡茲東南黎庶所得
保室家而安耕鑿者

神之賜也朕恭膺

天命撫御寰區夙夜敬共以承上下神祇之祀所期海
宇蒼生永蒙庇佑惟茲浙西郡邑實為瀕海要衝比年
以來仰荷

神靈嘉貺頻昭安瀾共慶迺者風潮鼓盪衝潰隄防近
逼民居吏人震恐朕痾瘝在念軫惻惟殷迺遣重臣周

行相度涓日鳩工為海疆圖久遠莫安之計用是潔誠
致禱虔命在工大臣敬展祀事昭告惓忱惟

明神俯念海隅億萬生靈城郭田廬於茲託命隄工木
石皆出脂膏力役所需民衆勞苦伏冀洪昭福佑默相
大工綏靜百靈風恬波息俾功作得施長隄孔固克底
厥績衛護蒸民保聚生全安享樂利則東南列郡溥被
庥祥朕實拜

明神之功德於無疆矣謹告

河源神祭文

惟

神源從天漢澤潤坤輿溯禹迹於當年時營廟貌顯

神功於歷歲默佑生靈惟甘陝之巖疆實邊陲之重地

乃者和風甘雨協應以時下隰高原豐登有慶閭井樂

恬熙之俗蒼黎享仁壽之休靈貺孔昭朕心嘉慰用展

馨香之薦虔申報謝之典不盡之忱統祈

神鑒尚饗

河神祭文

朕心殷河務敬禮

明神歷載以來屢蒙庥應惟是睢寧之境正當河道之衝向因北岸之淤沙橫激中泓之巨浪難施疏濬寂屬險工乃至今年欣瞻上瑞時惟伏汎自汕引河順水勢以東趨暢流無阻刷遙灘而直下化險為平大溜通行開延袤之正軌新沙旋擁護綿亘之長隄人力不勞河防永固朕懷慰愜感慶實深凡斯嘉貺之弘昭允賴

神功之默相是用虔申謝悃祇薦苾芬仰冀明靈彌徵
顯佑俾茲南土永慶安瀾

祈雨祭風神文

朕奉

天子民刻刻以雨暘時若為念乃今春三月膏雨愆期
恒風示儆朕心懷悚惕瞻仰焦勞思過省愆誠勉臣庶
伏念節宣和氣

神實專司夙彰福國之功宜切勤民之隱是用潔蠲齋

被昭告悃忱仰冀

明神默垂孚佑風威歛息澍雨均霑用觀百穀之成大
慰三農之望竭誠籲禱惟

神鑒之謹告

太歲壇諸神祈雨祝文

朕承

眷命撫御蒸黎宵旰孜孜勤求民瘼乃者時當仲夏雨
澤愆期早暵可虞焦勞倍切齋居省過惶悚靡寧諄諭

臣工實心修省方殷籲禱幸沐甘霖仰惟
天鑒之垂慈實賴

神功之默相載抒誠悃虔展精禋伏冀膏澤覃敷雨暘
時若溥洽三農之慶用觀百穀之成謹告

世宗憲皇帝御製文集卷十九

欽定四庫全書

世宗憲皇帝御製文集卷二十

祭文

歷代帝王廟碑亭告成祭文

繼天立極勲華光被於寰區撫世誠民功德丕昭於宇
宙緬懷前烈知創業之維艱歷溯芳徽念守成之不易
我

皇考聖祖仁皇帝綜百王之盛德定萬世之公評

特沛綸音弘修祀朕敬承

先志祇薦明禋廟貌增崇既布筵而列位豐碑式建爰
洒翰以摛文備舉彝章用垂曠典於戲皇猷炳煥累朝
之統緒相承至治馨香百代之英靈如在尚祈昭鑒來
享苾芬

關帝廟碑亭告成祭文

英風炳著麗皎日於中天茂典加隆溯靈源於先代增
光秩祀肅展明禋緬惟

闕帝氣壯乾坤靈昭宇宙仰

神威之赫濯欽世澤之綿長晉秩上公崇祠後殿頃值
豐碑之肇建特陳雕俎以告虔於戲寵賁絲綸薦烝嘗
於三世文鐫琬琰昭義烈於千秋尚冀來歆鑒茲忱悃

都城隍廟碑亭告成祭文

明威有赫資翊衛於金湯秩祀惟虔仰憑依於廟貌肅
陳牲醴用展精裡惟

神聰明正直弘宣福國之功化育生全覃布佑民之澤

朕虔修祀典敬禮

明神春秋之祈報既隆棟宇之規模益擴茲者聿新丹
雘爰勒青珉用遣專官載申昭告仰冀

神功默相靈貺丕彰繡甸蒙庥慶百嘉之暢遂金甌鞏
固樂四氣之調和謹告

明太祖并十三陵祭文

國家善政覃敷鴻恩徧浹而殊禮更施於勝國優秩特
加於後人廢絕之祀復興妥侑之靈有託隆規錫慶奕

禊承休仰惟

聖祖仁皇帝至德同天深仁溥地萬幾之暇矚念前猷
謂有

明太祖創業維勤宅心克廣經文緯武英略蓋於九州
酌古準今制作隆於一代逮於繼世雖無暴虐之君爰
及末年每值災荒之運因賊徒之蠭起致國祚之潛移
我朝戡定寰區屢加恩澤禁樵蘇而設護詣

陵寢以薦馨然而胄裔寢微春秋闕祀

皇情感惻每眷遺徽

宸翰留貽將行曠典朕上承

先志命考宗支以

明太祖第十三子代簡王之後

恩賜阿思哈尼哈番朱廷樞之嫡孫朱之璉授為一等侯列五等之班備三恪之典俾傳世爵以奉烝嘗載煥儀章用申祭告於戲崇階厚祿我國家特沛夫殊恩濡露降霜

帝子孫永承其禋祀尚其歆格鑒此榮施

賢良祠祭文

功銘鐘鼎尚書垂元祀之文德冠巖廊周禮著大猷之
典蓋旗常載績本臣子之素懷而俎豆薦馨乃朝廷之
崇報几筵斯設牲醴攸陳爾和碩怡賢親王望重親賢
萃靈川嶽忠誠體國樹當代之羽儀精白一心作羣僚
之模範爾大學士公圖海等當烈祖肇基創造朝多佐
命之英逮

皇考膺歷綿長時盛宣猷之彥驅除暴亂定疆寓於域
中震耀聲靈收版圖於海外內則台星卿月奏亮工熙
績之勲外則錫鉞授麾贊阜物安民之化或寬弘為度
喻江海之包涵或清白持躬比冰霜之皎潔或純勤宣
力夙夜靡愆或慎密居心始終一節朕追思前蹟聿考
遺徽特渙綸音用咨廷議允諧公論爰卜良辰既祠宇
之告成序官階而列次將以表揚既往沛酬庸褒德之
恩激勸將來勵懷古欽風之志於戲名傳史牒美茂迹

之長昭禮重明裡想英靈之如在奠茲芬苾尚克歆承

和碩怡親王初次祭文

業成翊贊資藩翰之懿親化致昇平賴股肱之良弼而
況勞績獨高於朝寧德位俱隆勲庸迴越於簡編親賢
備美既忘身以盡瘁深悼徃而傷懷惟王為

皇考聖祖仁皇帝之子朕之親弟也天與恪誠性成忠
孝凜晨昏之

聖訓謹奉步趨盡臣子之良規仰蒙

慈愛當朕鴻基之初紹命王總理之是膺矢白日以勿
欺竭恭勤而匪懈剛方卓立鎮靜於紛繁之時惴惴自
將贊襄於密勿之地是用益加委任俾展謨猷理軍務
之機宜管度支之出納督領周廬之環衛興修畿甸之
營田而王體朕心為已心視國事如家事總官府之鉅
細經畫咸周殫夙夜之公忠施為悉當至於民生吏治
察利弊而極力敷陳吉士蓋臣辨貞邪而多方保護是
用周知旁燭幽隱得以上聞決策定謀膚功於焉迅奏

佐治安之大計致熙皞之淳風凡歷八年有如一日忠
敬而兼之誠直勤慎而加以廉明朕嘗表之以示褒王
實當茲而不愧功在社稷洵中外所共知名勒鼎鐘亘
古今而罕匹斯乃迓庥

列祖篤生碩輔於皇家荷慶

上天誕降宗親於泰運寬厚仁慈之度宜其延享遐年
和平正直之懷足以祇承多福豈期證候漸致沉綿尚
力疾以入庭每思覲謁迨養疴而移地惟恐聞知朕縈

繫弗忘焦憂莫釋商量醫藥恨療救之無方默禱神祇
歎精虔之靡感雖流芬耀烈非闕壽算之短長而一德
同心寧解肝腸之悽愴豐功偉績合配享於

廟廷懿德鴻聲更光垂於史牒親臨朱邸悵望總帷方
頒優恤之恩綸特薦芳筵於初祭於戲眷腹心之密寄
精爽常存念手足之至情音容已隔濡毫紀行書百幅
以難宣醺酒抒哀淚千行而不竭王其鑒格尚克歆承

和碩怡賢親王祭文

嗚呼哀哉賢弟仙逝倏已閱三載矣音容儼然遂隔幽
明思念纏綿與時俱積從前奠醊悉循國家之典制而
為文祭告亦多授意摘詞今則葬期已屆揮淚含痛自
製祭章親率宮眷及諸弟子姪輩以家人之禮致奠攢
廬至情無文直抒胸臆惟賢弟聽之憶昔幼齡趨侍
庭闈晨夕聚處比長遵奉

皇考之命授弟算學日事討論每歲塞外扈從形影相
依賢弟克盡恭兄之道朕兄深篤友弟之情天倫至樂

宛如昨日事也朕兄臨御之初實賴賢弟為腹心股肱
之寄賢弟秉忠誠之至性展翊贊之嘉謨凡有關於吏
治民生國政軍計者無不悉心籌畫慎密敷陳務期海
宇乂安蒼生被澤即宮中府中事無鉅細亦莫不措置
咸宜經營悉當自古史冊所傳良弼懿親一心一德者
疇能與賢弟比倫乎賢弟之德備矣功宏矣不亟為表
揚以傳永久朕兄之心其能安乎縱極力表揚而於賢
弟之丹誠偉績又豈足云報乎嗚呼修短之不齊者數

也生死之難忘者情也得賢弟而中道棄捐朕兄之德
涼也賴朕兄而遺徽表著賢弟之福厚也今者朕兄以
念弟之深痛弟之切大顯其勲名尊崇其典禮凡經理
於身後者無不殫竭其心思而賢弟生也榮死也哀名
既不朽壽且無疆賢弟之福不已全乎假令克享大年
後朕而逝即朕之孝子順孫善體朕心亦未必能洞悉
賢弟數十年之心跡如今日朕之經理周詳固有遺憾
然則賢弟洵有全福而朕之懷憂抱恫失所依毗其福

不及賢弟遠矣朕兄數年以來追慕

皇考

皇妣明發有懷悽愴曷極今賢弟又舍我而仙逝矣既
抱終天之恨更增同氣之悲含酸茹歎其何能自己耶
賢弟忠愛之惓朕兄所深知況萬幾在御決不肯過自
悲傷以貽九京之隱痛惟有敬念

皇考付託之重深體賢弟輔弼之忱於當日忠謹箴規
之言比時未曾見諸施行者必追憶而悉踐之力圖政

治之有成以不負

皇考不負賢弟庶幾在天之靈為之欣慰而默相庇佑
焉嗚呼援筆寫心肆筵饋奠哀哀滿紙淚酒盈觴賢弟
其領受之嗚呼哀哉

誄

和碩怡親王誄并序

雍正八年五月初四日和碩怡親王以疾薨於位春秋
四十有五嗚呼哀哉維我弟賢王夙承

皇考聖祖仁皇帝懿訓陶鎔德器諳練謨猷以忠誠正直之心沉毅堅剛之力寬厚和平之量精明豁達之才輔翼朕躬勤勞王事官府一體上下同心萬幾之協贊匪輕八載之恪恭如一國尊良弼誼切懿親斯固上帝之庇佑邦家

皇考之保安宗社默佑我賢王以弘宣偉烈永佐昇平而眉壽蕃禧自將申錫於無疆者也詎意謀猷方壯倚賴殊殷累月沉疴一朝薨逝悼股肱之莫寄悵肺腑而

難言友愛之情纏綿曷已嗚呼去歲冬聞王有疾心焉
憂之選醫視藥祝禱神祇日夕徬徨迫冀痊可廼王則
時觀庭軒時移遠墅恐病狀之宣露致心緒之牽縈力
疾上言多方安慰迨王言旋京邸朕以祈雨還宮聞王
疾篤命駕臨視王知之脫然仙逝蓋不欲以永訣傷朕
懷焉嗚呼王於生死存亡之頃惟知有君而不知有身
王之心至是安矣朕將何以為情哉王之薨也王公卿
尹僚吏弁卒欽王之德望佩王之教澤感王之恩施者

罔不驚悼倉皇涕泗相告謂王為國柱石為世楷模失我賢王我將安仰及至發引之辰徒行而送者萬計貴賤老穉匍匐呼號嗚呼王之生也人肅然敬歿也人慘然悲非王之賢何以致此然而王之美德懿行不樂人知人亦無從而知即朕知王之深亦言之而莫能罄也雍正四年朕嘗書額賜王曰忠敬誠直勤慎廉明八字之褒無溢詞有遺美焉王純孝之性徵於髫髻凜遵慈誨謹度飭躬以故榮遇有加始終勿替朕御極之初

命王總理國政屹然靜鎮衆莫能撓盖王識力迴越仁
智兼優敏決而默運小心嚴明而善持大體其領度支
也賦式維均出納有節其營水利也心勞樹藝績底平
成其於吏治則惠民者興曠職者去見聞所及鉅細敷
陳其於人才則不棄微長弗苛小過鑒別悉當培植良
多至於嚴督禁旅密運軍機轉餉籌邊更徵武略王少
稱神勇留意兵戎帷幄運籌計周萬里以故年來征討
重賴其能嗚呼王之厚德豐功昭然天壤而王之造膝

願請大有造於國家者中外臣民無由通曉及今而不
言美將湮焉朕心何忍維王誠心愛國好善施仁護端
正之賢藩保忠勇之良佐蠲浮徵而永紓民力補虧帑
而不事追賠宿逋子裔亦予矜全細過羣僚悉還舊秩
凡此皆王之一片公心平時讜論為熙朝植良善為盛
世沛恩膏而密勿之請命宣忠其為功於寰宇者不誠
大且遠哉稽之周禮司勲有曰凡有功者書於太常祭
於大烝然則太廟之饗配以有功固酬德報勲之彝典

也如我怡親王之純孝純忠以先輔鴻業則為

皇考之令子大猷大策以底定丕基則為

列祖之功臣几筵分配永顯殊庸集議於朝僉云允協
王固建不朽之盛烈稱宇宙之全人矣嗚呼儀文具備
悲悼徒增加謚崇封聊申隱痛朕上念

九廟付託之身下納百僚勸慰之語亦復深自節抑未
敢過情惟是德心之契昆弟之親實有迥異於尋常者
情極而悲時難自遏不得已仿古昔哀誄之體備述令

德攬淚成篇俾千萬世子孫臣庶周知遺烈追慕賢藩
其詞曰

天昌鴻祚國仰元臣興朝篤睦族敦倫友恭之軌史
牒炳麟纘承大統倚毗懿親偉矣賢宗厥惟淑弟手足
相依腹心攸繫壘麓克諧鹽梅互劑愛以親生心由天
契朕懷乾惕凜若冰淵樹旌振鐸饑渴求賢疑丞輔弼
疏附後先顧茲上爵孰秉中權於維我王位崇德備三
光麗霄五嶽鎮地緯武經文懷仁抱義總攝之司惟王

弗愧王心精白如日皎然王性果決如玉彌堅精思獨
運巨力能肩鞠躬盡瘁於茲八年八年星霜九重宵旰
班集晨墀牘陳夕案一字無欺片言善斷不憚辛勤良
勞翊贊心膂協應形影追隨時都時俞時警時咨臨軒
俯聽趨殿書思雍雍式好肅肅其儀朝宁家庭千秋萬
歲骨肉深恩永懷勿替寸晷未離何堪長逝異地猶悲
奚容隔世嗚呼哀哉人生不朽曰德與功德臻盛大功
極穹窿氣充天表神滿寰中壽民壽國齡享奚窮維王

大忠可貫金石維王深仁代宣雨澤扶翼天樞滋培國
脉百鍊之金無瑕之璧其忠維何本乎至誠心在社稷
屏絕私營其仁維何原於好生惠施朝野不市虛名胸
有鈞衡身為屏翰邦之九賦默抒成算國之六師獎勤
警玩調燮咸宜經綸兼貫明農治地率吏安民有聞必
奏罄意而陳懷抱冰雪氣煦陽春化被黎庶德徧臣鄰
赤誠之佐保以百口青海之師紓其掣肘衛國者心迴
天者手咎且弗辭功於何有朕沛大澤實允王言為王

造福慶衍璿源偶與王語汗若泉奔稽首辭謝曰天子
恩公忠如彼仁厚若此甫申鍾靈旦奭婉美元化方調
瑞徵旋起何意亨衢遽羈修軌茂勲赫奕顯秩峻增望
垂惇史饗配大猷禮因德備謚以功增

廟庭禮典王克歆承我賜瑩神筮叶吉屹屹豐碑煇
耀星日赤舄袞衣永安靈宅雲馬風車出遊象闕嗚呼
哀哉德動天鑒慶象昭彰吉人舉事瑞現雲光善孚衆
志仰戴難忘萬聲合慟奠馭悽愴生榮死哀於斯已極

惟朕深情輾轉胸臆恭順之容依依若即忠讜之言歷
歷堪憶總惟親莫莫解幽憂素服匝月未釋深愁鵲
聲婉棠棣花稠交暉園近雲物先秋王有良嗣朕其訓
誨王有殊勲朕其紀載仰荷皇圖寧不自愛抑情紀哀
傳流億代嗚呼哀哉

世宗憲皇帝御製文集卷二十

欽定四庫全書

世宗憲皇帝御製文集卷二十一

詩

雍邸集

春園讀書

一片芳菲上苑東
晝長人坐落花風
蒙茸細草侵階綠
濃艷天桃映閣紅
香惹遊蜂窺几席
晴薰舞蝶傍簾櫳
韶光脉脉春如海
諷詠芸編興不窮

山池晚步

夕陽斜映綠波清閒傍長橋步屨行山靜鹿過銜瑞草
溪平魚泳趨飛英濛濛嵐氣侵衣潤款款香風撲面輕
徙倚景光天欲暮凌虛樓閣帶霞明

咏自鳴鐘

巧製符天律陰陽一彈包絃輪旋密運鍼表恰相交晷
刻毫無爽晨昏定不淆應時清響報疑是有人敲

春日泛舟

蘭舟宛轉浪紋平一櫂容與蕩晚晴上苑深春芳草綠

西山落照遠峰明長空鴉返千林暝絕塞鴻歸萬里情
縹緲中流憑覽勝始知仙境有蓬瀛

夜坐

獨坐幽園裏牕開竹影斜
稀聞更轉漏但聽野鳴蛙
活泉流玉溶溶月照沙
悠然怡靜境把卷待烹茶

春暮登樓

坐惜芳華晚登樓獨舉觴
眼看春色暮行踏落花香
藻密魚堪隱林深鳥易藏
憑欄無限思新月逗清光

月夜對落花有感

落花滿徑月朦朧
夜靜閒吟料峭風
煙外鐘聲來院落
天邊桂影入簾櫳
萋萋芳草春將去
冉冉韶光酒莫空
新綠成陰紅紫減
清和天氣正沖融

月下獨酌

春月娟娟映水清
一斟一酌聽泉聲
微風暗拂花枝動
幾點殘紅撲酒罍

春院小飲

春深紅紫映樓臺檻外風香花盡開東海玉盤看乍湧
恰逢童子抱尊來

雨霽

節屆清和春未賒看山不厭半雲遮微風扇暖蒸新雨
為我催開後院花

暮春

春暮饒佳景閒行踏碧苔落花浮水面戲蝶舞牆隈風
拂蘭叢暖陰移竹影回流光將入夏更有牡丹開

立夏

熏風吹水綠於苔
羲馭徐催朱夏來
隄畔龍鱗皺古栢
庭前兔目綻新槐

暢春園芍藥花開作

首夏清和殿閣開
園中景物足徘徊
翩翩紫燕銜泥去
現晚黃鶯過水來
槐影初圓當永晝
桐陰漸引上層臺
更憐芍藥臨風好
香襲書帷錦作堆

花間小飲

長夏初臨芍藥開薰風拂席送香來
仙姿綽約翻紅袖
月影婆娑照綠盃

曉晴

曉起浮窓日色明苔痕滋碧露光瑩
繞堦幾樹看花發
對岸一聲聽鳥鳴潑刺遊魚翻浪急
低徊舞蝶傍簾輕
春雲漠漠寒偏峭默乞天公十日晴

宮中直宿作

寶殿燭輝煌承恩宿未央御爐香不燼
宮漏滴初長堦

砌移花影罨魚透月光太平無一事常願奉

君王

夏日讀書

夏日書齋靜荷風拂檻來芬芳盈几席翠帙帶香開

早行

早行晴野樹如煙日出東山映繡韉寂寂荒村臨水際
翩翩飛鳥向雲邊空濛朝露侵衣潤艷冶閒花入目妍
扈從

鑾輿承

色笑欣隨豹尾快揚鞭

江邊書屋

湍響聽瀧瀧簾開對大江
園幽人跡少把卷倚南窓

晚登海河樓

晚景登樓望波涵夕照明
觀瀾清俗慮倚檻動詩情
孤鶩衝霞去扁舟向海行
悠然塵境遠惟聽棹歌聲

題友人園

郊堂氣象幽
墻角遶清流
雨霽西山近
風來北牖秋
疎檐看皓月
輕舫逐浮鷗
即景陳杯斚
心期好自由

賜觀金蓮花

異種遙從塞外傳
香臺曾為捧金仙
檀心吐艷薰風裏
鈿朵含芳積翠邊
月殿桂飄難比瑞
秋籬菊綻不同妍
移來御砌增佳翫
千葉休誇太液蓮

友人書屋

羨君瀟灑致如仙
心遠何妨地更偏
雨洗嵐光青入牖

風搖竹影綠當筵

雨牕

茅簷飛細雨爽氣乍侵人移榻臨牕坐詩懷自覺新

熱河園中避暑

別業遙連上苑邊承恩避暑興怡然
蘭舟曉泛清波裏荷蓋擎珠顆顆圓

夏日泛舟

殿閣風生波面涼溯洄徐泛芰荷香
柳陰深處停橈看

無數纖條戲碧塘

園中即景

林亭幽靜晚風涼
水氣侵衣荇藻香
好景片時期莫負
開牕披卷意徜徉

晚泛

畫橈閒泛暮霞明
風細波微暑氣輕
更轉碧山尋勝蹟
恰逢雙鶴似相迎

月下閒步

閒行曲岸邊西嶺暮蒼然草蔓迷幽逕橋危咽細泉溪
風吹緩帶夜色逼吟肩徙倚看林杪雲開月影遷

觀雨

密雨如膏灑碧絲稻花漠漠遶長陂虛齋睡起推牕看
私喜甘霖正及時

前廊

曲廊斜轉接修篁坐倚層巖意興長細草敷榮侵榻綠
野花爭艷襲衣香碧梧枝上聽蟬噪翠柳隄邊看鶴翔

此際閒身無一事怡然嘯咏自徜徉

書齋秋暝

幽齋新雨後爽氣泛池荷碧落疎星淡晴窓皓月多隔
花聞漏滴倚枕和漁歌更愛流螢好悠揚拂檻過

恭侍乾清宮

殿閣參差際碧天玉階秋草靜芊綿雲開北闕祥光滿
雨過西山霽色鮮寶座金爐香靄靄彤墀仙掌露涓涓
承歡頻荷

溫顏接凜惕趨蹌

繡宸前

中元侍從

中元令節慶皇州雲散晴空暑氣收
薄海兆民歌大有
鈞天廣樂奉宸遊
瑶星合彩蘭盆映
銀蕊分光蓮浦浮
燈月交輝看似畫

聖情怡豫太平秋

山翁

山翁避暑在山中竹籟松濤面面風三樂啟期何所事
朝陽睡到夕陽紅

漁翁

漁翁獨釣曲江灣春雨秋風總是閒滿眼兒孫長繞膝
賣魚沽酒醉蒼顏

運河舟中二首

扈

蹕乘文舸沿流閱運河曉窓飄白絮夜岸沐金波酒幔

籬邊颺漁舟葦畔歌長途看美景偏覺此中多

其二

解纜放中流晨光漾桂舟遠村煙淡淡野老意悠悠拋
粒遊魚聚依萍乳鴨浮水天同一色疑是泛瀛洲

登望海樓

觀海登樓日未斜晴空萬里淨雲霞纔經一陣風過檻
倏起千堆雪捲花貝闕鰲峰如可接鵬津蛟室豈終遐
詭詞未許張融賦到此方知語不誇

自鳴鐘

八萬里殊域恩威悉感通
珍奇爭貢獻鐘表極精工
應律符天健聞聲得日中
蓮花空製漏奚必老僧功

詠玉泉山竹

御園修竹傳名久嫩篠抽梢早
出墻雨滌微塵新浥翠
風穿密葉澹聞香
低侵幽澗波添綠
靜褰虛牕影送涼
更羨堅貞能耐雪
長竿節節挺琳瑯

秋夜

新秋秋月照虛檐寂歷山扉夜不闌
默坐焚香遺萬慮
蕭蕭梧竹水潺湲

晚晴

雨餘林隙漏斜曛石砌幽花似茜裙
爽氣漸來殘暑退
移牀巖畔看秋雲

聽蟬

幽齋人跡少蟬翼響疎林大火方流序
微涼早託音
乍聽分遠近欲覓隱高深旦夕軒亭外
清機伴我吟

題劉松年畫

瀟灑松年畫，神迴不羣。松杉相間，秀風水自成。文柔
櫓輕隨浪，蒼山半入雲。超然三島境，何處得塵氛。

臨流

脉脉清渠遶舍流，移牀就柳坐溪頭。鏡涵霽影浮斜日，
波映寒光報早秋。村畔砧聲聽漸暝，林端蟬翼噪逾幽。
此中偃息容疎懶，底用乘槎海上遊。

扈

蹕途中觀穫

秋爽獵邊城天高氣象清
登場占物候觀穫暢

皇情巖谷縈車騎雲霞拂旆旌
豫遊叨扈從薄劣愧恩榮

塞外中秋

駐蹕邊庭夜中秋一鏡圓
遙從滄海畔飛落碧峯巔
溢彩浮堯箏流輝拂舜筵
坐深光愈迴景物倍清妍

大獵

五校琱弓勁三秋野獸肥
乘時講武事大獮振兵威
狡兔寧藏跡封熊悉入圍
獵歸數軍實落日照龍旂

塞外秋興二首

路出關山外秋空日漸高
清霜凝曉旆寒色透征袍
風勁飛鷹捷川長獵騎豪

皇威揚四遠邊徼戢弓刀

其二

駐蹕依林麓風多野水鳴
旌旗飄暮靄鐃吹咽邊聲
雞

塞霜逾白龍沙月更清
卻看行殿外諸部盡歡迎

題范蠡載歸圖

獨有艱危時方見子臣職
吳越爭雌雄彼此各努力
夫差好拒諫只為紅顏惑
所以范大夫留之恐傾國
功成載歸湖斯意無人識
朗然照青史去住皆可式

答友

筆健如錐世共稱開緘
但覺霧雲興深藏未許懸
齋壁直恐龍蛇帶雨騰

瀛臺泛舟二首

春深遊上苑鼓枻盪中流波湧方壺島林開翡翠樓落
花飄兩岸垂柳拂扁舟此日歡無極

君恩被特優

其二

暮轉西池棹風微錦浪平蜻蜓閒自得鸕鶿遞和鳴舉
網雙鱗獲停杯四韻成仙山何處訪即此是蓬瀛

即事

當晝垂帷靜清和景物佳鋪箋摹古帖披卷暢幽懷檻
外花香度簾前燕語諧日長真似歲綠竹伴虛齋

初夏至玉泉山

綠野薰風至夜來春已過撲衣飄落絮貼水出新荷浪
暖魚吹沫泥香燕作窠臨泉聊命酒披拂愛煙蘿

書齋坐雨

長夏書齋靜雲低拂講帷竹風掃翠石荷雨滴清池逸
興閒新釀閒情檢舊詩晚涼生几席團扇不須披

午日

天中節屆日逾賒解愠薰風透薄紗處處相酬三角黍
家家笑饋五時花蒲觴引滿巡筵轉桂楫如飛競渡譁
四海纖邪消影跡佩符何用繪丹砂



世宗憲皇帝御製文集卷二十一

欽定四庫全書

集部

世宗憲皇帝御製文集卷二十五

臣永瑤恭校

侍讀臣孫球覆勘

覆校官主事臣李駿

校對官主簿臣郭祚臧

謄錄監生臣劉能

謄錄監生臣劉紳

欽定四庫全書

世宗憲皇帝御製文集卷二十二

詩

雍邸集

便殿恭侍

承歡便殿接天香
披拂熏風愛日長
時雨連朝滋稻隴
晴霞一片映湖光
凜遵

聖訓聞詩禮
勉竭愚忱效頌揚
浩蕩恩波淪億兆
衢歌喜聽祝無疆

狼居胥山大閱十韻

帝為生民計狼胥大閱兵窮荒金鼓震朔漠旆旌明令
出山川動威揚神鬼驚技嫻百戰勇恩重一身輕預卜
妖氛散懸知海宇清彼狂擒子獻蠹爾倒戈迎遁去渾
無路爭歸盡布誠鷹搏驅烏伏螳臂駭車行不憚殊方
遠惟期邊塞平濡毫歌懋烈吉日愧難賡

功成回

鑾恭頌二首

指顧靖邊烽懷生盡服從遐荒歸禹甸大漠紀堯封廟
算無遺策神功邁昔蹤凱旋旌耀日光景霽

天容

其二

翠華旋萬里即日解征袍共仰神機邃深維

聖體勞凱歌喧後隊巷舞迓前旄拓土無中外

皇猷協覆幬

扈

蹕山行

紫塞秋山麗霜楓錦作堆
草深麋鹿伏風急雁鴻來
瀑水穿林響寒花向日開
忻隨

清蹕後攬轡重徘徊

塞外觀稼

邊陲環沃壤樹藝遍臯陽
東作頻霑雨西成未隕霜
兩岐占瑞應遺秉見豐穰
比戶盈寧日衢歌感

聖皇

觀魚

羽衛隨行幄逶迤綠水隈棹分寒藻入波湧錦鱗來網
罟無空舉鱸魴自暴腮烹鮮供

御饌竟日豫清洄

冬日

聖駕自塞外回鑾謁

陵恭紀

威德綏荒服

乘輿按部回歡聲盈朔漠瑞靄被龍堆鞭拂霜花淨旗
飄野吹開更遵豐沛路

陵殿薦尊壘

陪京

新豐傳舊里今觀濯龍池天地開神奧山河啓

帝基金戈勞百戰玉葉衍千枝追遠

皇情切趨從仰孝思

侍從興京謁

陵二首

承先崇報本橋道駐龍旗萬國梯航集敷天雨露隨精
誠通寢殿肅穆奉宗彝敬仰松楸古昭森盛烈垂

其二

龍興基景命王氣結瑤岑不覩艱難迹安知啓佑心山
河

陵寢壯弓劍歲時深盛典叨陪從威儀百爾欽

登望海樓

極目澹滄海涵泓無所從量包天地外色染古今容浪
起思鯤化雲飛羨鶴蹤坐觀淵默裏萬派自朝宗

皇父勘河省方不獲奉侍瞻戀慚悚交迫於懷敬成一

律

河漕籌國計疏導恤民生俯允廷臣請親勞

聖主行未能隨

法駕何以效愚情定省無由達中宵愧悚并

聖駕南巡自春徂夏瞻依心切恭賦斯篇

春光荏苒熏風至

聖駕勤民尚未還幸有堦簾隨越舸愁無羽翼赴吳關
晨趨北闕螭頭上夜夢南雲豹尾間

清蹕恭迎堪計日幾回翹首潞河灣

皇父親祀北郊甘霖大霈恭紀

甫竣宣防畧鑾回五月中郊原需惠雨稼穡切

皇衷方澤期將屆精禋事必躬禮成霖澍霈

聖意信天通

雨後即事

雨足適新晴
脩然天宇清
殷憂舒

北闕櫺比望
西成殿閣微
風度階除殘
暑輕濡毫思
誌喜禾黍競
滋榮

立秋日怡情亭

亭引微風暑氣蠲
碧空如洗淨雲煙
地饒佳景供清賞
節送新涼稱午眠
幾處蟬鳴啁積翠
數行魚隊樂漪漣
誰云秋色多蕭瑟
無限青山入目妍

孟秋扈

蹕觀稼恭紀

殿角微涼起豳歌大火流蓮房新墜粉梧葉早驚秋玉
露滋芳甸金風入畫樓

聖心勤稼穡躬自省西疇

賦得一輪寒月照書厨

燦爛書千卷瑩然一鏡懸映籀光澈澈透幌影娟娟秘
閣搜奇字芸牕理舊編夜深看愈皎清坐嬾成眠

冬日早朝

星疎紫禁啓金扉
銀燭輝煌映瑣闥
鐘鼓聲催仙仗肅
虹蜺影逐彩旂飛
寒風幾度輕搖珮
瑞雪初飄乍點衣
喜覩太平文物盛
天香滿袖早朝歸

雪夜即事

永夜漏方中
瓊瑤灑半空
氣侵書幌冷
光閃燭花紅
興洽張琴好
心清得句工
詰朝恭省候
披拂玉階風

元夕

皓月高懸不夜城燈輝萬井慶昇平臣民語和嵩山語
喧笑聲連爆竹聲火樹拂雲飛赤鳳琪花滿地落丹英
金吾弛禁歡遊劇載路笙歌直到明

詠黃河燈

華燈夜滿原布置列星繁縹緲探三島離奇演八門旌
旗隨火轉語笑逐風喧寓意藏韜畧遊觀荷

聖恩

早春

凍解和風至，璿杓正建寅。
叢梅初綻玉，餘雪已銷銀。
柳眼窺人近，鶯聲到耳新。
須知迎日處，應早被陽春。

舟次

扈

蹕閱長河微風起，碧波牙檣連百里。
珠旆轉層坡，拂几調琴韻。
臨牕聽棹歌，時清多樂事。
萬景總春和。

晚泊

傍柳泊湖船，停橈薄暮天。
遠村煙樹裏，歸雁水雲邊。
釣

叟垂香餌樵童曳紙鳶江鄉民物美風景更熙然

順風放舟

長河風力駛千里片帆輕槳歇村頻轉橈停岸自迎野
鳬衝荇起歸雁拂雲鳴試問郵亭吏何如駟馬行

天津舟中對月

初月照扁舟潮聲洗客愁孤村一樹矗隔岸數帆收霄
漢聞鳴雁沙汀玩宿鷗漁歌入夜寂風景似清秋

水園

春日獵汀洲歡聲拍浪浮雲檣排八陣桂棹競中流鳴
鏑摧騰羽飛煙罨絳旂昆明誇水艦豈足擬

宸遊

春日潞河

潞河初解凍桂檝溯滌洄霽色明書帙春濤勸酒杯雲
排羣鳥度風鼓萬帆開扈從

軒遊日惟慚作賦才

自暢春園入城途次口占

錦堞連雲日欲西
暖風弱柳玉河隄
翩翩紫燕如相識
一路飛鳴逐馬蹄

春日隨

駕舟次

新柳綠絲柔依依拂

御舟悠揚牛背笛
款乃水邊謳翠羽
飛桑扈嬌音轉栗
留春晴天氣好歡喜奉

宸遊

園居

十分春色屬清明
翠積嵐光媚曉晴
簾幙爭飛村社燕
池臺巧囀上林鶯
青絲搖曳縈煙檻
紅雨霏微撲繡楹
賦罷小詩清晝永
閒隨白鶴柳邊行

春郊

策馬向春田
閒遊野趣偏
飛花時點袂
舞蝶故隨鞭
萍密藏溪鶯
風高戾紙鳶
酒旗遙入望
茅店古松邊

閱永定河應

制

帝念切民生鑾輿冒暑行遶堤翻麥浪隔柳度鶯聲萬
姓資疏濬羣工受準程

聖心期永定河伯助功成

巡子牙河建壩應

制

承恩隨鷁首私幸覩

皇猷躬定安瀾策民無昏墊憂秧針抽複隴梅雨灑良

疇勉效河平頌多慚士女謳

恭覲

聖心勤勞頌揚不盡又成長句

叨陪

法駕閱新隄夙夜辛勤閱庶黎底定九河功姬美時巡
三輔典堪稽煙村黯黯青帘颺岸柳陰陰白馬嘶沉璧
寘薪誠默契神人應有綠圖携

秋日

浙瀝金風暑漸收
園林景物足清幽
青山環列遙如畫
雲漢斜暉望欲流
露咽寒蛩聲唧唧
月明野鶴意悠悠
豐年不用農人告
手把香秔驗有秋

作書

擗管曾聞渴驥奔
魚箋揮灑墨香痕
雖慚腕弱無佳致
淨几明窓頌

聖恩

荷花

玉井移根種亭亭曲沼中紅衣初墜粉翠蓋晚搖風隔
浦纖歌隱回塘麗影同彩鴛雙泳處珠露瀉香蘂

對月

新秋玉露洗長空水鏡孤懸映綺櫳一片清光涼似水
萬年宮樹照青蔥

秋雨

一雨收殘暑微涼發樹端風清催早桂氣潔媚幽蘭曲
沼波痕漲平疇稻穎繁詩成晚霽後秋月逗煙巒

駕幸新園

警蹕臨山墅仙雲拂曉來池臺增景色旌蓋仰昭回
野鳥迎鑾舞閒花傍輦開歌慙魚藻詠賦乏上林才

宮中秋日應

制限暉闌衣歸

九重殿閣卿雲繞駕瓦參差麗曙暉北闕輕陰連瑣闥
西山爽氣裒彤闌疎桐轉影遙迎蓋早桂含香乍拂衣
欲頌高深言莫罄朝朝慚戴

聖恩歸

皇父頒賜

御製詩扇恭紀

慈恩莫並與天崇

御製遙頒寵錫隆揮灑仙毫凝湛露捧搖寶扇被仁風

四詩尋繹

宸章裏八體兼收

睿筆中

聖蘊難窺真萬仞於茲力學願磨礪

禁苑秋霽應

制有序

康熙庚辰秋七月十九日時雨初晴風日清朗新涼入

座林沼澄鮮

皇父聽政之暇親洒

宸翰製禁苑秋霽詩一章命諸昆弟分賦應

制臣未及與向晚趨

庭荷蒙

頒示天籙琳瑯雲章絢爛回環捧誦莫測高深又

命臣補賦伏念臣才學弇淺初研聲律未涉藩籬恭覩
聖藻昭垂目奪神移益深愧悚仰承

恩諭

君父之前詎敢自藏其醜謹呈蕪句用博

天顏一笑云爾

靈囿逢秋霽西山曉翠張澄波添太液爽氣發長楊叢

桂含香嫩疎桐轉影涼

宸襟披拂處魚藻有輝光

世宗憲皇帝御製文集卷二十二